

**Imaatigut assartuinermi akit qanoq nalimmassarneqarsinnaaneri pillugu apequteqaat aallaavingalugu siunnersuut**

(Inatsisartunut ilaasorta, Knud Kleemann)

**Akissuteqaat**

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)

**Siullermeerneqarnera**

Naalakkersuisut sinnerlugit Inatsisartunut ilaasorta, Knud Kleemann, siunnersuuteqarneranut qutsavigaara.

Nunatsinni assartuinermi akigititaq naleqqussarneqarsinnaanersut oqallisigineqarnissaa siunnersuuteqartup kissaatigaa, taamaalilluni maannakkut assartuussinermut akigititat nunami namminerme assigiillutik, innuttaasut tamarmik assigiimmik nassiussinermut akeqartitsivigineqarlutik, assigiimmik akeqartitsinermut taarsiullugu akigititat imaatigut assartuussinerme pissusiviusuni aningaasartuutitut siunissami naapertuunnerulissallutik.

Angallaviit Royal Arctic Line A/S-imut aningaasaqarnikkut imminut akilersinnaasumik ingerlanneqartut atugassarititaasut atuuttut malillugit ingerlaannassasut, angallaviit aningaasaqarnikkut attanneqarsinnaanngitsut kiffartuussinissamut isumaqatigiissutitigut aningaasalersorneqassasut, siunnersuuteqartup siunnersuutigaa.

Royal Arctic Line A/S-ip nassiussanik assartuussinermut kisermaassinerata atorunnaarsinneqarnissaa pillugu misissuineq Naalakkersuisut ulloq 22. oktober 2024 saqqummersippaat. Misissuinerme takuneqarsinnaavoq Nuup aamma Europap akornanni imarpikkoortumik angallavik sinneqartooruteqarfiusartooq, angallaviit uteqattaarfigineqartartut aammalu nunaqarfinnut angallaviit amigartooruteqarfiusarlutik. Tamatuma saniatigut aningaasanut inatsisikkoortumik nunami namminerme usinik assartuussineq ukiumut 62 mio. koruunit sinnerlugit tapersiivigineqarpoq. Ilusiliaq maannakkut atuuttoq katillugu 300 mio. koruunit sinnerlugit tapersiivigineqarpoq. Assartueriaaseq nalimmassassagutsigu, usinik assartuussinermut aningaasartuutit taakkua sillimaffigineqartussaapput.

Assigiimmik akeqartitsinerup atorunnaarsinneqarnera najukkani inuiaqatigiinni ikinnerusuni naleqqutinngitsumik nanertuisinnaalluni malitseqarsinnaasoq, siunnersuuteqartup nammineerluni tikkuarpaa. Naalakkersuisut naliliipput assigiimmik akeqartitsinerup atorunnaarsinneqarnerani umiarsuit tikittarnerisa akulikissusaani nioqqutissaateqartarnermilu nunami namminerme assigiinngitsumik inissisimasarneq annertusitinneqarsinnaasoq,

taamaalillunilu najukkani innuttaasut akornanni mattusimaneqarluni misigisimaneq sakkortusitissinnaallugu.

Naggasiutigalugu nunami namminermi usinik assartuussinerup nutarterneqarnissaa pillugu siunnersuuteqartup anguniagaqarumanera Naalackersuisunit isumaqatigaarput. Royal Arctic Line A/S-ip angalanissamut pilersaarutit naleqqussartuarpai aammalu ingerlaavartumik assartuussinermut akigititanik appartitsiniarsariuarluni. Nunami namminermi usinik assartuussineq ullutsinnut naleqquttuaannassasoq aammalu innuttaasut pisariaqartitaannik naammassinnittuaannassasoq, Naalackersuisunit kissaatigaarput.

Partiit isummersornerisa tusarnissaat Naalackersuisunit qilanaaraarput.